

四庫全書

子部

欽定四庫全書

太平御覽卷二百三十五

宋 李昉等 撰

職官部三十三

太史令

殿中監 六尚附

大長秋

太史令

春秋元命苞云屈中挾一而起者為史史之為言紀也

天度文法以此起也

尚書酒誥曰太史友內史友

太史內史掌國典法所賓友者也

周書曰維正月王在成周味爽召三公右史戎夫曰今夕朕寤遂事其警余乃取遂事之要戒申戎夫王之朔望以聞也

禮記曲禮下曰天子建六太曰太宰太宗太史太祝太士太卜典司六典

又玉藻曰動則左史書之言則右史書之

春秋左傳曰趙穿攻靈公於桃園宣子未出山而復太史書曰趙盾弑其君以示於朝宣子曰不然對曰子為正卿亡不越境返不討賊非子而誰宣子曰嗚呼我之懷矣自貽伊戚其我之謂矣孔子曰董狐古之良史也書法不隱

又襄四曰太史書崔杼弑其君崔子殺之其弟嗣書而死者二人嗣續其弟又書乃舍之南史氏聞太史盡死執

簡以往聞既書矣乃還

又曰魯昭公二年晉韓宣子聘魯觀書於太史氏見易象與魯春秋曰周禮盡在魯矣

周禮春官下曰太史掌建國之六典

太史日官也春秋傳曰天子有日官

諸侯有日卿

大戴禮曰太子既冠成人免於保傅則有司過之史

春秋文耀鉤曰楚立唐氏以為史官蒼雲如蜺圍軫七

蟠中有荷斧之人嚮軫而蹲

蟠猶周也蹲踞也

楚驚唐史曰君

慢命又簡宗廟

命天命也軫於天文楚之分也向之而踞是慢命踞簡宗廟

於是晝

遺炎煙耀於蒼雲精消無文

軫火精雲水氣圍軫水也  
晝日陽也炎火亦陽也遺

之者蒙蠟所也水難勝火三陽併  
氣且火炎上宜消滅也文則規也

唐史之策上減蒼雲

告神以  
史功也

韓詩外傳曰據法守職而不敢為非者太史也

毛詩序曰國史明乎得失之迹傷人倫之廢哀刑政之  
苛吟詠性情以諷其上達於事變而懷其舊俗者也

春秋後語曰晉太史屠恭見晉之亂以其圖法歸周

國語曰鄭桓公為司徒問於史伯曰王室多故

史伯周  
太史也

余懼及之焉

漢書曰司馬喜生談談為太史公

如淳曰漢儀注太史公武帝置位在丞相

上天下計書先上太史公副上丞相序事如古春秋遷死宣帝以其官為令行太史公文書而已臣瓚案百官表無太史公茂陵中書司馬談為太史令遷仕為郎中使西征巴蜀以南略

邛笮

音昨

昆明還報命是歲天子始建漢家之封而太史

公留滯周南

如淳曰周南洛陽也

不得與從事發憤且卒而子遷

適反見父於河洛之間太史公執遷手而泣曰予先周

室之太史也自上世嘗顯功名虞夏典天官事後世中

衰絕於予乎汝復為太史則續吾祖矣今天子接千歲  
之緒封泰山而予不得行是命也夫是命也夫予死汝  
必為太史為太史無忘吾所欲論著矣遷俯首流泣曰  
小子不敏請述論先人所次舊聞不敢闕卒三歲而遷  
為太史令

又藝文志曰古之王者世有史官君舉必書所以慎言  
行昭法式也

又曰青史子注古史官記事也



又曰孔甲盤孟篇

黃帝史官

又曰史籀

周宣王太史作大篆

又曰秦太史令胡毋敬作博學章

東觀漢記曰陰猛以博通古今為太史令

司馬彪續漢書曰張衡字平子以郎中遷太史令妙善

璣衡之正紀渾天儀復造候風地動儀以精銅鑄成員

徑八尺合蓋隆起形如酒杯如有地動樽則震尋其方

面知震所在驗之以事合契如神

張璠漢紀曰初王師敗於曹陽欲浮河東下侍中太史  
令王立曰去春太白犯鎮星於牛斗過天津熒惑又逆  
行守北河不可犯也由是遂不北渡河將自軹關東出  
立又謂宗正劉艾曰前太白守天關與熒惑會金火交  
會革命之象也漢祚終矣晉魏必有興者後立數言於  
帝曰天命有就去五行不常盛代火者土也承漢者魏  
也能安天下者曹姓唯委任曹氏而已曹公聞之使人  
語立曰知公忠於朝廷天道深遠幸勿多言

應劭曰太史令秩六百石掌天時星厯凡歲奏新年厯凡國祭祀喪娶之事奏良日國有瑞應災異記之

又曰太史令秩六百石望郎三十人掌故三十人昔在  
顯頊南正重司天北正黎司地唐虞之際分命羲和厯  
象日月星辰敬授民時至於夏后殷周世叙其官皆精  
研術數竅神知化當春秋時魯有梓慎晉有卜偃宋有  
子韋鄭有裨竈觀乎天文以察時變其言屢中有備無  
害漢興甘石唐都司馬父子抑亦次焉末塗偷進苟忝

茲階既闈候望競飾邪偽以凶為吉莫之懲紘

漢舊儀曰丞周史官至武帝置太史公司馬遷父談世為太史遷年十三使乘傳行天下求古諸侯之史記

魏志曰黃龍見譙橋玄問太史令單颺颺曰其國當有王者

吳志曰吳範字文則會稽上虞人也劉備盛兵西陵範曰後當和親終皆如言其占驗明審如此權以範為騎都尉領太史令數從訪問欲知其訣範秘惜其術不以

至要語權由是恨也

又曰韋曜字弘嗣孫亮即位諸葛恪輔政表曜為太史  
令撰吳書

沈約宋書曰太史掌歷數靈臺專候日月星氣焉

世本曰沮誦蒼頡作書

宋衷註曰沮誦蒼頡黃帝之史官

唐書曰乾元元年改太史局為司天臺掌天文歷數風  
雲氣色有異則密封以聞其小史有司歷保章正靈臺  
即挈壺正等官各有差

呂氏春秋曰夏太史令終古見夏桀惑亂載其圖法而泣乃出奔商商太史高勢見紂之迷載其圖法出奔周晉太史屠黍見晉之亂以其圖法歸周

帝王世紀曰黃帝使蒼頡取象鳥跡始作文字之篆史官之作蓋自此始記其言行冊而藏之

文士傳曰張衡性精微有巧藝特留意於天文陰陽算數由是遷太史令

環濟要略曰太史令取善紀述者使記時事天子圖書

計最典籍皆副焉

賈誼書曰不知日月之時節不知先王之諱與國之忌不知風雨雷電之情凡此屬太史之任也

揚雄太史令箴曰昔在太古爰初肇記天地之紀重黎是司降及唐虞乃命羲和欽若昊天百政攸宜夏帝不愼羲和不令酒時亂日帝旅爰征庶寮至殷唯天為難夏氏黷德而明不蠲

荀悅申鑒曰古者天子諸侯有事必告廟左右二史臧

否成敗無不存焉得失一朝榮辱千載善人勸焉悖人懼焉故先王重之以副賞罰以輔法教宜於今者官以其方各書其事歲盡則書之於尚書

殿中監

六尚附

六典曰殿中監掌服御之事惣尚食尚藥尚衣尚乘尚舍尚輦六局之官屬備其禮物而供其職事少監為之貳

尚食奉御掌謹其儲供辨其名數直長為之貳



尚藥奉御掌合和藥物辨藥上中下之三品直長為之  
貳

尚衣奉御掌衣服詳其制度辨其名數直長為之貳  
尚乘奉御掌內外閑廐之馬辨其麤良而率其習馭直  
長為之貳

尚舍奉御掌殿庭張設湯沐而潔其灑掃直長為之貳  
尚輦奉御掌輿輦繖扇之分分其次序而辨其名數直  
長為之貳

大長秋

天官書曰宦者四星在帝座之西周有宮正宮伯

皆主王官

中官之長 宮人

掌王之六寢

內宰

理王內之政令以陰禮教六宮陰禮婦禮也

閹人寺

人官戰國時有宦者令秦有將作衛尉少府各一人

並皇

后卿也

漢景帝中六年改將作為長秋

顏師古曰秋者收成之時長者恆久

之意故以為皇后官也

或用中人或用士人

中人也

成帝加置太

僕一人掌太后輿馬通謂之皇太后后卿皆從太后宮為

官號無太后則闕至後漢復增置丞中宮謁者令中宮

尚書中宮私府中宮永巷令中宮黃門冗從僕射虎賁  
官騎中宮官署令藥長並隸大長秋歷魏晉宋梁陳後  
魏皆有長秋之號而官屬省置不同北齊有長秋寺置  
卿中尹各一人諸宮閣掖庭等並用宦者隋改曰內侍  
省煬帝改為長秋監置令一人丞二人並用士人唐武  
德初復為內侍省皆用宦者

後漢書曰鄭眾字季產南陽犍人也為人謹敏有心永  
平中初給事太子家肅宗即位拜小黃門遷中常侍和

帝初竇太后秉政后兄大將軍憲等並竊威權朝臣上下莫不附之而衆獨一心王室不事豪黨帝親信焉又憲兄弟圖作不軌衆遂首謀誅之以功遷大長秋

又曰良賀位為大長秋清儉退後陽嘉中詔九卿舉武猛賀獨無所薦引帝問其故對曰臣生自草茅長於官掖既無知人之明又未嘗交接士類昔衛鞅因景監以見有識知其不終今得臣舉者匪榮貽辱固辭之

又曰曹騰字季興順帝在東宮鄧太后以騰年少謹厚

使侍皇太子書特見親愛及即位騰為小黃門遷中常侍桓帝得立騰與長樂太僕州輔等七人以定冊功皆封亭侯騰遷大長秋用事省闈三十餘年奉事四帝未嘗有過其所進達皆海內名人

又曰曹節字漢豐南陽新野人也靈帝即位以定冊功封長安鄉侯時竇太后臨朝后父大將軍武與太傅陳蕃謀誅中官節等與長樂五官史朱瑀等矯詔誅武蕃等節遷長樂衛尉後轉大長秋



太平御覽卷二百三十五

欽定四庫全書

太平御覽卷二百三十六

宋 李昉等 撰

職官部三十四

國子祭酒

司業

博士

少府監

將作監

國子祭酒



六典曰國子祭酒司業之職掌邦國儒學訓導政令有  
六焉一曰國子二曰太學三曰四門四曰律學五曰書  
學六曰算學

韋昭辯釋名曰祭酒者謂祭六神以酒醑之也辯云凡  
會同饗燕必尊長先用先用必以酒祭先故曰祭酒漢  
時吳王年長以為劉氏祭酒是也

徐廣釋祭酒云古主人具饌則賓中長者一人舉酒祭  
地是則長者為祭酒也

漢書曰吳王賜號為劉氏祭酒應劭曰禮飲酒必祭示有先也故稱祭酒飲時唯尊長者以酒沃爵也

又曰張安世薦蘇武明習故事奉使不辱命宣帝以武壯節老臣令朝朔聖號稱祭酒甚優寵之

續漢書百官表曰建武初置五經博士太常差次有聰明威重者一人為祭酒總領綱紀

漢書百官表注曰博士祭酒一人掌國子學早朝服進賢兩梁冠佩水蒼玉

蜀志曰先主既定益州廣漢太守夏侯纂請秦宓為師友祭酒

晉書曰素瓌字山甫為國子祭酒時屬經喪亂禮教陵遲瓌上疏求立學徒帝從之國學之興自瓌始也

又曰裴頠為祭酒奏立太學講堂築門闕刻石寫五經晉中興書曰杜夷字行齊以儒學稱中宗以夷為丞相祭酒中興初皇太子凡三至夷舍執經問義

沈約宗書曰博士秦官也掌通古今員多至數十人有

僕射光武增為十五人並益一經有數家之學故也皆  
教弟子光武改僕射曰祭酒祭酒者一位之元長也

齊書曰張緒竟陵王子良領國子祭酒武帝勅王晏曰  
吾欲令司徒辭祭酒以授張緒物議以為云何子良竟  
不拜以緒領國子祭酒

齊職儀曰晉令博士祭酒掌國學而國子生師事祭酒  
執經葛巾單衣終身致敬

梁書令曰王承字安期為國子祭酒承祖儉父暉並居

此職三代為國師前代未有當時以為榮

陳音簡

崔鴻十六國春秋前秦錄曰建元七年高平蘇通長樂  
劉祥並以碩學者儒尤精二禮堅以通為禮記祭酒居  
于東庠祥為儀禮祭酒處于西亭堅每月朔旦率百寮  
親臨講論

後魏書曰韓子熙累遷國子祭酒子熙儉素安貧常好  
退靜遷鄴之始百司並給兵刀時以祭酒間豫止給二  
人或有不令其陳謁者子熙曰朝廷不與祭酒兵何關韓

子熙事論者稱之

後周書曰盧誕本名恭祖拜給事黃門侍郎魏帝詔曰  
經師易求人師難得朕諸兒稍長欲命卿為師於是親  
幸晉王第勅晉王以下皆拜之於帝前因賜名曰誕又  
以誕儒宗學府為當世所推乃拜國子祭酒

隋書曰楊汪字元度拜國子祭酒帝令百寮就學與汪  
講論天下通儒碩學多萃焉論難鋒起皆不能屈帝令  
御史書其問答奏之省而大悅賜良馬一匹

又曰元善遷國子祭酒上嘗親臨釋奠命善講孝經於是敷陳義理無之以諷諫上大悅曰聞江陽之說更起朕心賚絹百疋衣一襲

唐書曰許後胤常侍太宗講後為睦州刺史因入朝乞骸骨太宗召問曰朕與卿刺史資以自養何謂即求致仕後胤對曰年老筋力不逮望得私地時見闕庭太宗曰卿氣力猶強欲何官也後胤陳謝不敢太宗曰朕昔從卿讀書卿今日從朕求官但言所欲不相違也時國

子祭酒缺後肖奏言之因授國子祭酒

風俗通曰孫卿有秀才善為詩禮易春秋至齊襄王時而孫卿最老師三為祭酒

齊王融為王儉讓國子祭酒表曰竊以庠均義重振古所崇資師道尊有來攸尚匪曰蘭芷疇變入室之情不自朱藍何遷素絲之質

司業

唐書曰韋叔夏遷成均司業則天時特下制曰吉凶禮



儀國家所重司禮博士未甚詳明成均司業韋叔夏太子率更令祝欽明等博涉禮經多所該練委以叅掌冀弘典式自今司禮所脩儀注並委叔夏等刊定訖然後進奏

又曰歸崇敬上言司業者義在禮記曰樂正司業正長也言樂官之長司主此業爾雅云大板謂之業按詩周公頌設業設虞崇牙樹羽則業是懸鐘磬之奠虞也今太學既不教樂於義則無所取請改司業一為右師一為

左師位正四品上

博士

六典曰博士掌教文武官三品以上及國公子孫

應劭漢官儀曰博士秦官也博者通博古今士者辯於  
然否孝武帝建元五年初置五經博士秩六百石太常  
差次有聰明威重者一人為祭酒總領綱紀

漢舊儀曰武帝初置博士取學通行條博識多藝曉古  
文爾雅能屬文章者為之朝賀位次中都官吏稱先生

不得言君其弟子稱門人也

漢書曰賈誼文帝召為博士時年二十許最為少每詔命議下諸老生未能言誼盡為之對人人各如其意所出

又曰韋賢字長孺為人質朴少欲篤志於學兼通禮尚書以詩教授時人號稱鄒魯大儒徵為博士

又曰公孫弘對策時百餘人太常奏第居下天子擢弘對為第一召入見容貌甚麗拜為博士待詔金馬門也

又曰元鼎中徐偃為博士使行風俗偃矯制使膠東魯國故鑄鹽鉄還奏事張湯劾偃矯制法死偃以為春秋之義大夫出疆有可以安社稷利萬人專之可也湯不能誅

東觀漢記曰甄宇拜博士每臆詔賜博士羊人一羊有大小肥瘦時議欲殺羊分肉又欲投鉤宇因取瘦者自是不復爭後召會詔問瘦羊博士所在京師以為號又曰歐陽歛其先伯和從伏生受尚書至歛七世皆為

博士敦於經學恭儉好禮

後漢書曰光武每朝會輒令桓榮於公卿前說經書帝稱善曰得生幾晚會博士缺帝欲用榮榮叩頭讓曰臣經術淺薄如同門生郎中彭閔揚州從事臯弘帝曰俞往汝諧因拜榮為博士

又曰董鈞永平初為博士時草創五郊祭祀及宗廟禮樂威儀章服輒令鈞叅議多見從用當世稱通儒

華嶠後漢書曰初欲立左氏傳博士范升以為左氏淺

末不宜立陳元聞之乃詣闕上疏爭之更相辯對凡十餘上帝卒立左氏學也

漢舊儀曰孝文皇帝時博士七十餘人朝服玄端章甫冠

魏志曰樂祥字文載少好學黃初中徵拜博士于時太學初立博士十餘人學多偏僻不敢親教備員而已唯文載五業並授

又曰文帝黃初五年大學置五經課試之法置春秋穀

梁博士

又曰明帝太和二年詔曰尊儒貴學王教之本也自頃  
儒官或非其人將何以宣明聖道其高選博士才任侍  
中常侍者

吳志詔曰古者建國教學為先所以道世治性為時養  
器也自建興已來時事多故吏民頗以目前趨務去本  
務末不循古道夫所尚不淳則傷化敗俗其案古置學  
官立五經博士核取應選加其寵祿科見吏之中及將

吏子弟有志學者各令就業一歲課試差其品第加以位賞使見之者樂其榮聞之者羨其譽以敦王化以隆風俗

晉令曰博士皆取履行清淳通明典義若散騎常侍中書侍郎太子中庶子以上乃得名試諸生有法度者及白衣試在高等拜郎中

晉書載記曰姚泓受經于博士淳于岐岐病親詣省病拜于牀下自是公侯見師傅皆拜焉



後魏書曰崔逸字景携好古博涉為國子博士每因公事逸常被詔獨進博士持命自逸始之

後周書曰盧辯字景宣為太學博士以大戴禮未有解詁辯乃注之其兄景裕為當時碩儒謂辯曰昔侍中注小戴今爾注大戴庶纂前修矣

隋書曰馬光開皇初高祖徵山東義學之士光與張仲讓孔籠竇士榮張黑奴劉祖仁等俱至並授太學博士時人號為六儒

又曰馬光為太學博士嘗因釋奠高祖親幸國子學王公以下畢集光升座講禮啟發章句已而諸儒生以次論難者十餘人皆當時碩學光剖析疑滯雖辭非俊辯而理義弘贍論者莫測其淺深咸共推服上嘉而勞焉又曰王頗授著作佐郎尋令於國子講授會高祖親臨釋奠國子祭酒元善講孝經頗與相論難詞義鋒起善徃徃見屈高祖大奇之起授國子博士

又曰何妥授太學博士帝初欲立五后以問儒者辛彥

之對曰后與天子匹體齊尊不宜有五妾駁曰帝嚳四妃舜又二妃亦何常數由是封襄城縣伯

又曰房暉遠為國子博士會上令國子生通一經者並悉薦舉將擢用之既策問訖博士不能時定臧否祭酒元善恠問之暉遠曰江南河北義例不同博士不能遍涉學生皆持其所短稱已所長博士各各自疑所以久而不決也祭酒因令暉遠考定之暉遠覽筆便下初無疑滯或有不服者暉遠問其所傳義疏輒為始末誦之

然後出其所短自是無敢飾非者所試四百人數日便  
決諸儒莫不推其通博

魯國先賢傳曰漢文帝時聞申公為詩最精以為博士  
申公為詩傳號曰魯詩

李邕別傳曰邕上書太后數陳忠言其辭雖不盡施行  
輒有策詔褒贊焉博士著兩梁冠朝會宜隨士大夫例  
時賤經學博士乃在市長下公奏以為非所以敬儒德  
明國體也上善公言正月大朝引博士公府長史前

殷氏世傳曰殷亮建武中徵拜博士遷講學大夫諸儒論勝者賜席亮重席至八九帝嘉之曰學不當如是耶典略曰公儀休者魯博士也為魯相無所變更百官自正使食祿者不得與下民爭利

論衡曰王莽之時省五經章句博士弟子郭略夜定舊說死於燭下

少府監

六典曰少府監之職掌百工伎巧之政令總中尚左尚

右尚職治掌治五署之官屬正其工徒謹其繕作少監  
為之貳

漢官宰尹下曰少府言別為小藏故曰少府

漢書曰少府秦官掌山海池澤之稅以給供養

又曰歐陽地余字長賓為少府誠其子我死官屬送汝  
財物慎勿受汝九卿儒者子孫以廉潔著可以自成及  
卒少府官屬送數百萬其子不受天子聞而嘉焉賜錢  
百萬

後漢書曰東平王蒼為驃騎正月朔朝蒼當入賀故事少府給璧時陰就為少府貴傲不奉法漏將盡求璧不得蒼掾朱暉遙見少府主簿持璧乃往給曰試請觀之既得而馳奉之就復以他璧朝

張璠漢紀曰太常种拂與李儒戰而死子幼徵為少府鴻臚皆不受曰我父盡忠於朝而為時所妬父以身殉國為賊臣所害為臣子不能除賊何面目復覲明主三輔聞之為之感動

應劭漢官儀曰少府掌山澤陂池之稅名曰禁錢以給私養自別為藏少者小也故稱少府

魏志曰王觀徙少府大將軍曹爽使材官張達斫屋材及諸私用之物觀聞之皆錄奪以沒官少府統三尚方御府藏珍玩之寶爽等奢放多有干求憚觀守法乃徙為太僕

又曰楊阜字義山為少府卿侃然以天下為己任

三國志吳主遣少府徐祥至魏魏太祖謂祥曰孤比者



右越橫江之津與孫將軍遊姑蘇之臺獵長洲之苑吾志足矣祥對曰大王欲奉至尊以合諸侯若越橫江而遊姑蘇是踵亡秦而蹈夫差天下事去矣太祖曰徐生得無逆詐耶

臧滎緒晉書曰陳眡字國鎮過江為少府卿時大旱經久大興四年四月始雨有司奏應報賽宗廟山川中宗詔曰祈廟云報賽非奉尊上辭也吾意有疑眡以為舊山川有許報故雨應賽非大事不應告廟子無要君親

之道讀祭稱賽於義有違從之

唐書官品志曰少府卿位視尚書左丞置材官將軍左中尚方甄官平水中署南塘邸稅庫東西治平准細作炭庫紙官染署等令丞

將作監

六典曰將作大匠之職掌供邦國修建土木工匠之政總四署三監百工之官屬以供其職事少匠貳焉

漢書曰將作少府秦官掌治宮室

范曄後漢書曰魏霸徵拜將作大匠明年和帝崩典作  
順陵時歲冬地凍中使督促數罰掾吏以厲霸霸撫循  
而已初不切責而反勞之曰今諸卿被辱大匠過也吏  
皆懷恩力作功倍

續漢書曰曹襄字叔通遷將作大匠時有疾疫巡行病  
徒自省醫藥糜粥死者減少

又百官志曰將作秩二千石掌作宗廟路寢宮室丞一  
人六百石左右校令左右工徒掌木土之功并樹桐梓

之類列于道側

又曰李固字子堅遷大匠常推賢士孔融以將作大匠遷少府也

華嶠後漢書曰應順字仲華為將作大匠發摘衆姦皆極其刑豪猾之吏斂迹視事五年省費以億萬

應劭漢官儀曰世祖中興以謁者領其官章帝建初元年乃置其位次河南尹永元七年大匠應慎上言百郡計吏觀國之光而舍逆旅崎嶇私館貢篚之物朽濕曝

露昔晉霸國之盟主耳舍諸侯於隸人鄭子產以為大  
譏況今四海之大而可無乎和帝嘉納之

魏志曰楊阜字義山為將作大匠明帝時初治宮室發  
美女充後庭阜上疏欲省宮人諸不見幸者乃召御府  
吏問後宮人數吏守舊令對曰禁密不得宣露阜怒杖  
吏一百數之曰國家不與九卿為密反與小吏為密乎  
帝聞之而愈敬憚

晉書曰將作大匠陳總掘地得古文尚書奏今文長於

古文宜以古為正潘岳以為習用已久不宜復改

唐書官品志曰大匠卿位視太僕掌土木之功統左右

校諸署

汝南先賢傳曰應仲華遷大匠除藻飾之無用割有損  
之浮費凡所省息七億餘萬

太平御覽卷二百三十六

欽定四庫全書

太平御覽卷二百三十七

宋 李昉等 撰

職官部三十五

總叙將軍

左右衛將軍

附 諸衛將軍

左右金吾衛將軍

諸衛上將軍

總叙將軍

石氏中官占曰河鼓星主軍鼓一曰三星主天子三將



軍中央大星為大將軍左星為左將軍右星為右將軍  
所以備關梁而距難也

周禮夏官上大司馬曰凡制軍萬有二千五百人之民

也凡起徒役

王六軍

六鄉之數也鄉治文教軍定武功其道皆兼三才而兩之故數俱六

家一人也

也  
大國三軍

公侯之封也成國不過半天子之六軍

次國二軍

諸伯之封

小國

一軍

子男之封

軍將皆命卿

同視六事之人同於六鄉之大夫春秋之時列國有正卿為將

軍又以亞卿一人為佐由執政者貪其權遂以陵遲皆非周公之舊也

左傳襄十三年曰晉蒐於綿上以治兵使士丐將中軍

辭曰伯游長昔臣習於知氏以佐之非能賢也請從伯游使荀偃將中軍士丐佐之使韓起將上軍辭以趙武孝經左契曰將軍順虎銜珠大夫正海出魚

史記曰齊景公召穰苴與語大悅以為將軍將兵扞燕又曰孝文後六年匈奴入上郡周亞夫為將軍居細柳

宗正劉禮為將軍居霸上祝茲侯

徐廣曰表作松茲姓徐名悍也

軍棘

門以備胡

漢書曰楚王召宗義計事而悅之因以為將軍

范曄後漢書曰靈帝時望氣者以為京師當有大兵兩  
宮流血大將軍司馬許源說何進曰太公六韜有天子  
親于兵事可以威壓四方詔進大發兵講武于平樂觀  
下起大壇上建十二重五采華蓋高十丈壇東北有小  
壇復建九重華蓋高九丈引步兵騎士數萬人結營為  
陣天子親出臨住大華蓋下進住小華蓋下禮畢帝躬  
擐甲上馬稱無上將軍行陣三匝而還

魏志曰太祖令曰司馬法將軍死綏

魏書曰綏却也有  
角一尺無脚一寸

也

尸子曰十萬之軍無將軍必亂

左右衛將軍

諸衛將軍附

六典曰左右衛將軍之職掌統領宮庭巡警衛衛之法令以督其屬之隊仗而總諸曹之職務焉其左右驍衛左右武衛左右威衛左右領軍衛將軍所掌之職皆如之

晉書曰羊琇為晉臺左衛將軍

又曰吳隱之遷左衛將軍雖居清顯祿賜皆班親族冬月

無被嘗澣衣乃披絮勤苦同於貧庶

何法盛晉中興書曰南頓王宗字延祖拜左衛將軍為  
肅祖所昵委以禁旅

又曰王坦之字文度領左衛少有風格尚刑名之學嘗  
著廢莊論

又曰虞譚陳略曹毗毛安之並為左衛將軍

沈約宋書曰左右衛將軍晉文建國所置

隋書曰薛世雄性廉謹凡所行軍破敵之處秋毫無犯

帝由是嘉之帝嘗從容謂羣臣曰我欲舉好人未知諸君識否羣臣或曰臣等何能測聖心帝曰我欲舉者薛世雄羣臣皆稱善帝復曰世雄廉正節概有古人之風於是超拜右翊衛將軍

煬帝以左右衛為之

唐書曰元和中以前靈鹽等節度使王祕為右衛將軍祕在鎮無智略以馭人居常猜忌及多殺人以懼之衆益不附及召至踰月而授以衛將軍凡將相出入皆翰林草制謂之白麻祕始以責罷中書草制

隋書曰來護兒煬帝即位遷右驍衛大將軍帝甚親重  
之大業六年從駕江都賜物千段令上先人塚宴父老  
州里榮之

魏志曰許褚從太祖戰大破馬超等乃遷武衛中郎將  
武衛之號自此始也文帝踐祚遷武衛將軍

又曰曹爽自散騎常侍轉武衛將軍爽秉政又以弟訓  
為武衛將軍

王敦別傳曰敦子應字安期官至武衛將軍

隋書曰獨孤盛為左屯衛將軍宇文化及之作亂也裴  
虔通引兵至武象殿宿衛者皆釋仗而走盛謂虔通曰  
何物兵形勢太異也虔通曰事勢已然不預將軍事慎  
無動盛大罵曰老賊是何物話不及披甲與左右十餘  
人逆拒之為亂兵所殺

唐書曰咸通中以伶官李可及為威衛將軍曹確執奏  
曰臣覽觀故事太宗初定官品令文武官共六百四十  
一員顧謂房玄齡曰朕設此官員以待賢士工商雜色



之流假令術踰儕類止可厚給財物必不可超授官秩  
與衆賢君子比肩而立同坐而食太和中文宗欲以第  
官尉遲璋為王府率拾遺竇洵直極諫乃改授光州長  
史伏乞以兩朝故事別授可及之官帝不之聽

又曰高祖以李粲為左監門大將軍禮高年也初高祖  
問粲年幾對曰八十高祖曰公清幹之譽聞於隋日今  
年齒雖邁筋力未衰但監門之職非公莫可意欲相委  
如何粲以年老辭讓高祖曰藉公處分耳豈欲煩公筋

力耶於是以致自非殿庭皆乘蜀馬論者榮之

又曰王及善除右千牛衛將軍高祖謂曰朕以卿忠謹  
敕與卿三品要職他人非搜辟不得至朕所卿佩大橫  
刀在朕側知此官貴否

又曰李聽元和中為羽林將軍有名馬穆宗在東宮令  
近侍諷聽獻之聽以職總親軍不敢從及即位之始幽  
冀不靖太原與二鎮接境方議易帥宰臣進擬上皆不  
允謂宰臣曰李聽為羽林將軍不與朕馬是必可任

五代史云周廣順二年十二月詔改左右威衛復為左右屯衛避太祖諱也

左右金吾衛將軍

六典曰左右金吾衛大將軍之職掌中宮及京城晝夜巡警之法以執禦非常

百官表云秦有中尉掌徼循京師

如淳曰所謂遊徼循禁備盜賊也顏師古

曰徼謂遮繞之也音工鈞反

漢武帝太初元年更名執金吾

應劭曰吾者禦

也掌執金革以禦非常也顏師古曰金吾鳥名也主辟不祥天子出職主先導以備非常故執此鳥之象因以

名官也緹騎二百人輿服導從車騎滿路羣僚之中斯最

壯矣舊掌京師盜賊考按疑事漢郅都寗成王溫舒減

宣等皆截理橫噬虎而冠者也一切治辦亦旋誅黜又

置執金吾丞後漢掌宮外戒司非常水火之事

衛尉巡行宮中

金吾循激宮外為表裏以擒奸討猾日三繞行宮外及主兵器自中興但

專徼循不與他政又有執金吾吏文學執金吾佐執金

吾員吏魏武秉政復為中尉晉初罷直至後周置武環

率武侯率下大夫各二人隋置左右武侯府大將軍一

人將軍三人掌車駕出入先驅後殿晝夜巡察執捕姦  
非烽候道路水草所宜巡狩師田則掌其營禁煬帝大

業三年改為左右武侯衛所掌軍事名欽飛

漢官表曰漢有左弋

令武帝太初元年更名欽飛掌弋射屬少府光武省之隋氏採舊名

唐初又為左右武侯

府

貞觀十年十二月馬周奏京城諸街置鼓罷傳呼

龍朔二年改為左右金吾

衛置大將軍一人所掌與隋同將軍二人副其事

領官屬並

隋置唐

因之

後漢書曰初光武適新野聞陰后美心悅之後至長安

見執金吾車騎甚盛因歎曰仕宦當作執金吾娶妻當得陰麗華

漢官宰尹下曰吾禦也掌執金革以禦非常緹騎二百人五百二十人輿馬導從充滿於路世祖微時歎曰仕宦當作執金吾是也

漢書百官公卿表曰秦名曰中尉掌徼循京師有兩丞候司馬兵千人武帝太初元年更名執金吾

又曰毋將隆為執金吾侍中董賢方貴上使中黃門發

武庫兵前後十輩送賢及上乳母王阿舍隆奏武庫兵

器天下公用國家武備繕治造作皆度大司農錢

蘇林曰用

度皆出大司農

大司農錢自非乘輿不以給供養勞賜一出少

府蓋不以本職給末用不以民力供浮費別公私示正路也

又曰邛都為中尉丞相條候至貴倨也而都揖丞相是時民樸畏罪自重而都獨先嚴酷行法不避貴戚列侯宗室見都側目而視號曰蒼鷹也

東觀漢記曰馬防字孝孫拜執金吾性矜嚴公正上事  
處議多見用

續漢書曰陰識拜執金吾位特進入則極言正諫至與  
賓客語不及國事常慕仲山甫匪躬之節所用掾史皆

得天下俊哲

虞延傅寬  
等是也

又曰朱浮字叔元為執金吾帝以二千石長吏不堪任  
時有纖微之過者必見斥罷交易紛擾百姓不寧六年  
有日蝕之異浮因上疏切諫自是州郡奏長吏二千石



不任位者事皆先下三公遣掾史案然後黜退

又曰秩中二千石掌外司非常水火之事旦三繞行宮外又主兵器丞一人比千石

華嶠後漢書曰賈復為執金吾更始郾王尹尊及諸將反上召諸將議以檄叩地曰郾最強宛次之復率爾對曰臣請擊郾上笑曰執金吾擊郾吾復何憂耶

又曰耿秉為人威重有謀略拜執金吾每行幸秉恒領宿衛

謝承後漢書曰梁冀為執金吾歲朝託疾不朝司隸揚  
雄治之詔以二月俸贖罪

漢雜事曰辛慶忌明略威重任國柱石為執金吾

魏書曰臧霸與曹休討吳破賊呂範於洞浦徵為執金  
吾每有軍事帝咨訪焉

又曰崔琰遷中尉琰聲姿高暢眉目踈朗鬚長四尺七  
寸有威重朝士瞻望太祖亦嚴憚焉

又曰徐奕太祖以為中尉手令曰昔楚有子玉文公為

之側席汲黯在朝淮陽為之折謀詩稱邦之司直君之謂也

唐書曰高祖以徐世勣為右武侯大將軍

隋大業三年及唐初並為

左右武侯至龍朔二年復為左右金吾

詔曰念功愛善哲王彝訓紀德親

賢有國通典黎州總管萊國公世勣本自黎陽擁徒歸順任以藩兵誠効克彰節義不渝夷險無變信同金石操擬松筠宜加寵命用超恒序可賜姓李氏

又曰趙道興貞觀初歷遷左武侯中郎將明開宿衛號

為稱職太祖嘗謂之曰卿父為隋武侯將軍甚有當官之譽卿今克傳弓冶可謂不墜家聲因授右武侯將軍其父時解字仍舊不改時人以為榮

又曰裴諝為右金吾將軍建中初上以刑名理天下百吏震悚時十月禁屠以甫近山陵禁益嚴尚父汾陽王郭子儀隸人殺羊以門者覺之諝列奏狀上以為不畏強禦累遣宣諭或謂諝曰郭公有社稷功豈不為蓋之諝笑曰非爾所解且郭公威權太盛上新即位必謂黨

附者衆今發其細過以明不弄權耳吾上以盡事君之道下以安大臣不亦可乎

又曰臧希讓為金吾大將軍骯髒好談時政屢以理體上干公卿詔令集賢院待制希讓無學術及處近地從容公卿間強引文言以自賢而所聞知多道途語每發必差謬頗為士子所笑

諸衛上將軍

唐通典曰魏黃初中始有上大將軍以曹真為之吳亦

以陸遜為上大將軍後周建德四年增置上大將軍隋  
並以為武散官不理事上大將軍從二品

又曰唐武德初秦王既平王世充及竇建德高祖以秦  
王功殊古今自昔位號不足以為稱乃特置天策上將  
軍以拜焉位在王公上

又曰貞元二年九月詔曰六軍先已各置統軍一人今  
十六衛宜各置上將軍一人秩從其品繇是上將軍之  
官始列於品位

太平御覽卷二百三十七

欽定四庫全書

太平御覽卷二百三十八

宋 李昉等撰

職官部三十六

大將軍

察屬附

車騎將軍

驃騎將軍

驍騎將軍

衛將軍

前將軍

後將軍

左將軍



右將軍

大將軍

史記曰武帝伐匈奴以衛青為大將軍位在諸公上公卿皆拜惟汲黯獨揖有言大將軍尊貴不宜爾黯曰大將軍有揖客獨不貴耶青聞之愈重黯

漢書曰武帝以霍光為大將軍輔昭帝田千秋為丞相及昭帝初即位未任聽政事一決大將軍光千秋居相位謹厚有重名光謂千秋曰始與君俱受先帝遺詔令

光治內君侯治外宜有以教督使光無負天下千秋曰  
唯將軍留意即天下幸甚終不肯有所言

後漢書曰竇憲為大將軍威震天下復出屯武威會帝  
西祠園陵詔憲與車駕會長安及憲至尚書以下議欲  
拜之伏稱萬歲韓稜正色曰夫上交不諂下交不瀆禮  
無為人臣稱萬歲之制議者皆慙而止

又曰詔鄧騭班師朝廷以太后故遣五官中郎將迎拜  
騭為大將軍到河南使大鴻臚親迎中常侍賫牛酒郊

勞王主以下候望於道及至大會羣臣賜束帛焉

應劭漢官儀曰和帝以竇憲為大將軍位冠三公

又曰梁冀為大將軍以三世姻媾援立之功公卿希有  
上比伊霍舉高第茂才官屬皆倍餘府

魏志曰文帝以孫權為大將軍吳王加九錫

又曰太傅司馬宣王奏免曹爽皇太后詔召高文惠假  
節行大將軍事據爽宮太傅謂之曰君為周勃矣

後魏書曰莫題有謀策為大將軍平慕容麟賜爵東宛

侯後太祖欲廣宮宇規度平城四方數十里將模鄴洛  
長安之制運材數百萬以題機巧令監定焉

陳思王輔臣論曰知慮深奧然難測恭以奉上愛以  
接下納言左右為帝喉舌曹大將軍也

### 大將軍寮屬

魏志曰王謙為大將軍何進長史進以謙名公之胄欲  
與為婚見二子使擇焉謙弗許以疾免

臧榮緒晉書曰魯芝字世英耽思墳籍研精稽古自三

代之典聖人之微言皆該覽焉大將軍曹爽輔政高  
選賢明以為官屬延芝為司馬

續漢書曰李固字子堅拜議郎為洛陽令大將軍梁冀  
請為從事中郎

晉書曰鄭冲字文和以儒雅為業簞食瓢飲布衾緼袍  
不以為憂大將軍曹爽以為從事中郎

又曰李喜景帝輔政命喜為大將軍從事中郎喜到引  
見謂喜曰昔先公辟君而不應今孤命君而至何也對曰

先公以禮見待喜得以禮進退明公以法見繩喜畏之  
而至帝甚重之

何法盛晉中興書曰郭舒大將軍王敦以為從事中郎  
會敦討劉隗切諫敦大怒曰人中間言卿癡故炙卿眉  
頭今疾復發耶勿復語也舒曰明公聽舒一言舒聞古  
之狂也直周昌汲黯朱雲皆不癡也昔堯立誹謗之木  
舜懸敢諫之鼓公為勝堯舜耶而乃折舒使不得言敦  
默然也

竹林七賢傳曰阮籍字嗣宗為太傅司馬宣王叅軍遷景王大將軍從事中郎

通典曰從事中郎漢末官也陳湯為大將軍王鳳從事中郎是也在主簿上所掌與長史同

華嶠後漢書曰崔駰字季伯辟大將軍竇憲府掾憲新輔政貴重掾二十人皆故刺史二千石惟駰以處士年少擢在其間憲擅權驕恣駰數諫之出為長岑長不得意不之官而歸

華嶠後漢書曰馬融字季長為大將軍鄧騭舍人

晉陽秋曰義興周延為左率轉尚書遷大將軍諮議叅  
軍

車騎將軍

漢書曰元光元年以中尉程不識為車騎將軍屯鴈門

應劭漢官儀曰帝以元舅馬防為車騎將軍銀印青綬  
吳志曰孫壹奔魏以壹為車騎將軍儀同三司封吳侯  
以故王芳貴人邢氏妻之邢美色妬忌下不堪命遂共



殺壹及邢氏

蜀志曰鄧芝字伯苗義陽新野人益州從事張裕善相  
芝往從之謂芝曰君年過七十位至大將軍封侯為車  
騎將軍賞罰明斷善卹卒伍身之衣食資仰於官不苟  
素儉然終不治私產妻子不免飢寒死之日家無餘財  
後魏書曰王衍字文舒為散騎常侍出為征東將軍西  
兗州刺史衍屆治未幾屬爾朱仲遠稱兵內向州既路  
衝為其攻逼衍不能守為仲遠所擒以其名望不害也

令騎牛從軍久乃見釋還洛陽為車騎將軍

隋書曰長孫覽周武帝在藩與覽親善及即位彌加禮  
焉超拜車騎大將軍每公卿上奏必令省讀覽有口辯  
聲氣雄壯凡所宣傳百僚屬目帝每嘉歎之覽初名善  
帝謂之曰朕以萬幾委卿先覽遂賜名焉

驃騎將軍

漢書曰武帝以霍去病為嫖姚校尉征匈奴累有功寵  
冠羣臣置驃騎將軍秩與大將軍同

百官表注曰明帝即位以東平王蒼為驃騎輔政開東閣延英雄及蒼歸國有驃騎時吏丁牧周相以蒼敬賢下士不忍去之遂為王家大夫數十年事祖及孫帝聞褒美

又曰驃騎將軍漢官也長史司馬各一人金章紫綬五時朝服武冠佩山玄玉光武中興諸將皆稱大後天下既定武官悉省

東觀漢記明帝詔曰東平王蒼寬博有謀可以託六尺

之孤臨大節而不可奪其以蒼為驃騎將軍

又曰張意拜驃騎將軍討東甌備水戰之具一戰大破所向無前

又曰其將軍不常置比公者又有驃騎將軍建武二十一年復置驃騎將軍位次公有長史一人

後漢書曰劉隆為驃騎將軍行大司馬事隆奉法自守視事八歲上將軍印綬罷賜養牛上樽酒十斛應劭漢官儀曰漢興置驃騎將軍次相

隋書曰崔彭轉驃騎將軍宿衛性謹密在省闈二十餘年每當上在仗危坐終日未嘗有怠惰之容上甚嘉之上每謂彭曰卿當上日我寢處自安又嘗曰卿弓馬固以絕人頗知學不彭曰臣少愛周禮尚書每於休沐之暇不敢廢也上曰試為我言之彭因說君臣戒慎之義上稱善

韋昭辨釋名曰驃騎將軍車騎將軍秩比三公辨云此二將軍秩本二千石

世說曰何驃騎弟第五以高情遜避而驃騎令仕對曰  
然第五之稱何必減於驃騎

陳思王輔臣論曰魁傑雄特秉心平直威嚴足憚風行  
草靡戎昭果毅折衝厭難者司馬驃騎

梁簡文帝讓驃騎揚州刺史表曰常願侯服就列希同  
特進之班角巾還第不競龍驤之賞而天澤無涯名器  
總集竊以驃騎之官既為上將神州之重實號中土故  
以彈壓六戎冠冕九牧豈止司隸絳節金吾緹騎況復

任總皇畿位重速率何則驃騎之號歷選為重元狩之中始自去病永平之建特授劉蒼齊獻為公主所申吳漢因羣臣之舉

驍騎將軍

漢書曰李廣為驍騎將軍後出鴈門擊匈奴匈奴生得廣廣時傷陽死睨傍胡兒善馬暫騰而上南馳得脫廣亡失多當斬贖為庶人

東觀漢記曰光武以劉桓為驍騎將軍攻中山

又曰建武九年以劉喜為驍騎將軍攻涿郡

華嶠後漢書曰馬成字軍遷拜驍騎將軍北屯常山積數年上以其勤勞徵歸京師邊民多上書請之上復以成鎮撫之

魏志曰任城威王彰字子文性勇而鬚黃為驍騎將軍北出塞為寇所要彰獨與麾下數百騎突虜王聞之曰我黃鬚兒定可用也

又曰董卓立獻帝表太祖為驍騎將軍與計事太祖乃



變姓名間行東歸

齊書曰江數為侍中轉都官尚書領驍騎將軍王晏啓  
武帝曰江數今重登禮閣兼寄六軍慈渥所覃實有優  
忝但語其事任殆同閒輩天旨既欲升其名位愚謂以  
侍中領驍騎望實清顯有殊納言上曰數常啟吾為其  
鼻中惡今既以何胤王瑩還門下故有此迴換耳

衛將軍

漢書曰文帝至渭橋羣臣奉天子法駕迎代邸皇帝即

日夕入未央宮夜拜宗昌為衛將軍領南北軍

又曰文帝三年遣灌嬰擊匈奴發中尉材官兵屬衛將軍長安

晉書曰虞潛字思與為衛將軍貌如不武內實堅明

### 前將軍

漢書曰前後左右將軍皆周末官秦因之位亞上卿金印紫綬

又曰武帝征西夷有前後左右將軍宣元以後雜錯更

置或為前或為後或為左或為右雖不出征猶有其官  
在諸卿上為國爪牙所以揚示威靈於四遠折衝萬人  
如虎如熊

又曰左右前後將軍皆周官也秦漢因置以征四夷後  
雖不征伐其官常存

又曰傅喜為右將軍傅太后與政喜數諫后不悅上印  
綬病在家何武等上疏固請乃拜前將軍

魏志曰張遼字文遠鴈門馬邑人也聶壹之後以避怨

變姓少為郡吏武力過人文帝即位轉前將軍又黃初二年遼至洛陽宮文帝引遼會建始殿親問破吳意狀帝歎息顧左右曰此亦古之幼虎也

蜀志曰先主為漢中王遣詩拜雲長為前將軍及聞黃忠為後將軍怒曰大丈夫終不與老兵同列不肯受拜詩謂之曰夫立王業者所用非一昔蕭曹與高祖少小親舊而陳韓亡命後至論其班列韓最居上未聞蕭曹以為怨也今漢中王以一時之功隆崇於漢升然意之

輕重寧當與君侯齊乎王與君譬猶一體同休等戚禍福共之愚謂君侯不宜計官號之高下爵位之多少也僕一介之使銜命之臣君侯不受拜如是便還但相謂惜此舉動恐有後悔耳乃大感悟即受拜

漢升黃忠字也

後魏書曰谷楷昌黎人濮陽公渾曾孫也稱有幹局為前軍將軍楷眇一目而性甚嚴忍時人號為瞎虎

### 後將軍

漢書曰趙充國為後將軍西羌反上使御史大夫邴吉

問誰可將者充國時年七十餘對曰無踰於老臣者矣  
遣問焉曰將軍度羌虜何如當用幾人充國曰百聞不  
如一見兵難踰度踰遠也臣願馳至金城圖上方略然羌  
戎小夷逆天背叛滅亡不久願陛下以屬老臣勿以為  
憂

東觀漢記曰邳彤字偉君信都人也為曲陽卒正更始  
即位上以大司馬平河北至曲陽彤舉城降為後大將  
軍

魏志曰曹洪為文帝所廢明帝即位拜後將軍

蜀志曰黃忠字漢升先主為漢中王欲用忠為後將軍  
諸葛亮說先主曰忠之名望素非關馬之倫而今使令  
同列馬張在近親見其功尚可喻指關羽遙聞之恐必  
不悅得無不可乎先主曰吾當解之遂與羽等同位賜  
爵關內侯

晉中興書曰應詹字思遠太興三年為後軍將軍

晉起居注曰太始八年置後軍將軍掌宿衛

左將軍

漢書曰公孫賀封南甯

甯音芳  
孝反

以左將軍出定襄無功

失侯

又曰辛慶忌字子真為左將軍為國虎臣匈奴西域親  
附敬其威信

東觀漢記曰賈復字君文治尚書事舞陰李生李生奇  
之謂門人曰賈生容貌志意如是而勤於學此將相之  
器徵詣洛陽拜左將軍南擊赤眉新城轉西入關擊盆



子於澠池破之

魏志曰文帝即位以李邵為左將軍詔邵與曹真討安定盧水胡及東羌

晉書百官名臣曰王濟字武子起家中書郎遷左軍將軍

山濤啟事曰左將軍裴楷通理有才義

右將軍

漢書曰常惠以明習外國事勤勞數有功為右將軍

又曰何武薦辛慶忌宜在爪牙乃拜為右將軍

魏志曰徐晃字公明為右將軍性儉約畏慎為將常遠斥候歎曰古人患不遭明君今我遇之當以功自効

蜀志曰諸葛亮上疏曰臣以弱才叨竊非據親秉旄鉞以厲三軍不能訓章明法臨事而懼至有街亭違命之闕箕谷不戒之失咎皆在臣授任無方臣明不知人臨事多闕春秋責帥臣職是當請自貶三等以督厥咎於是亮為右將軍行丞相事所總制如前

何法盛晉中興書曰郭默為右軍將軍默既遠人樂為邊將不願內轉謂劉楨曰我能禦胡而不用更用虛名者且右軍主禁兵禁兵不妄出有急方便配給兵將無素是謂棄之安得不亂

又曰王羲之字逸少導之從子也幼訥於言人未之知年十三嘗見周顛異之時重牛心炙座客未啖先割啖之羲之於是聞名及長尤善草隸書為今古冠絕累遷為右將軍不樂京師遂往會稽與謝安孫綽等遊處山

陰有道士養羣鴻義之意甚悅道士云為寫黃庭經當  
舉羣相贈乃為寫訖籠鴻而去

太平御覽卷二百三十八

欽定四庫全書

太平御覽卷二百三十九

宋 李昉等 撰

職官部三十七

四征將軍

征東將軍

征西將軍

征南將軍

征北將軍

四鎮將軍

鎮東將軍

鎮西將軍

鎮南將軍

鎮北將軍

四安將軍

安東將軍

安西將軍

安南將軍

安北將軍

四平將軍

平東將軍

平西將軍

平南將軍

平北將軍

雜號將軍上

鎮軍將軍

撫軍將軍

征虜將軍

冠軍將軍

輔國將軍

領軍將軍

護軍將軍

中軍將軍

游擊將軍

積射將軍

積弩將軍

強弩將軍

殿中將軍

員外將軍



直閣將軍

征東將軍

魏志曰張遼字文遠為征東將軍征孫權被甲持戟先登陷陣衝壘入至權麾下

又曰滿寵字伯寧為征東將軍詔曰君典兵在外專心憂公賜田十頃穀五百斛錢二十萬以明清忠儉約之節

晉書曰王渾平吳轉征東大將軍復鎮壽陽渾不尚刑

名處斷明允時吳人新附頗懷畏懼渾撫循羈旅虛懷  
綏納座無空席門不停賓於是江東之士莫不悅附

### 征西將軍

東觀漢記曰馮異為征西將軍入關征赤眉

又曰耿秉為征西將軍鎮撫單于及薨南單于舉國發  
喪務面流血

魏志曰夏侯淵字妙才為征西將軍守漢中

後魏書曰陸真代人也少善騎射數從征伐所在摧鋒

陷陣後以功為征西將軍

征南將軍

魏志曰夏侯尚字仁伯淵從子也文帝與之親友太祖定冀州尚為軍司馬常從征討遷征南將軍

又曰曹仁為征南將軍鄢陵侯彰北征烏丸文帝在東宮為書戒彰曰為將奉法不當如征南耶

晉書曰羊祜為征南將軍寢疾求入朝既至洛陽會景獻梓宮在殯哀慟至篤中詔申諭扶疾引見命乘輦入

殿無下拜甚見優禮

後魏書曰馬景之字洪畧晉汝南王亮之後太宗時歸封蒼梧公加征南大將軍

征北將軍

魏志曰杜恕為幽州刺史時征北將軍程喜屯薊尚書袁侃等戒恕曰程申伯今俱仗節共屯一城宜深有以禮之

沈約宋書曰衡陽王義季為征北將軍徐州刺史

鎮東將軍

魏志曰臧霸字宣高太山華陰人也亡命東海以壯勇聞太祖募索得霸見而悅之以為琅琊相文帝即位遷鎮東將軍

鎮西將軍

魏志曰曹真字子丹文帝即位以真為鎮西將軍蜀志曰馬超父騰靈帝末與邊章韓遂等俱起事於西州初平三年遂騰率眾詣長安漢朝以遂為鎮西將軍

遣還金城騰為征西將軍

鎮南將軍

蜀志曰黃權字公衡伐吳敗於白帝既附魏文帝曰君捨逆効順欲追蹤陳韓耶權曰臣降吳不可歸蜀無路是以歸命敗軍之將免死為幸何古人之可慕帝善之拜鎮南將軍

吳志曰呂岱既定交州進討九真斬獲萬數又遣從事南宣國化及徼外扶南林邑堂明諸王各遣使奉貢權

嘉其功進拜鎮南將軍

晉書曰杜預為鎮南將軍繕兵甲曜威武乃簡精銳襲吳西陵督張政大破之以功增封三百六十五戶政吳之名將也據要害之地恥以無備取敗不以所喪之實告于孫皓預欲間吳邊將乃表還所獲之衆於皓皓果召政遣武昌監劉憲代之故大軍臨至使其將帥移易以成傾蕩之勢預處分既定乃啟請伐吳之期

後魏書曰唐和詣闕世祖優之待以上客高宗以和歸

誠先朝拜鎮南將軍

鎮北將軍

魏氏春秋曰許元字士宗為鎮北將軍都督河北諸軍事

蜀志曰魏延字文長先主大會羣臣問延曰今委卿以重任卿居之欲云何延對曰若曹操舉天下而來請為大王拒之偏將十萬之衆至請為大王吞之先主稱善衆咸壯其言先主踐尊號拜鎮北將軍



晉書曰何曾為鎮北將軍文帝使武帝齊王攸送之帝又過其子劭曾先勅劭曰客必過汝汝當預嚴劭不冠帶侍帝良久曾深以譴劭曾見崇重如此

安東將軍

王隱晉書曰武帝伐吳以王渾為安東將軍

晉公卿禮秩曰世祖以扶風王駿為安東大將軍

安西將軍

魏志曰曹仁字子孝太祖從弟也少好弓馬弋獵俊豪

並起仁亦陰結少年周遊淮泗之間遂從太祖為別部  
司馬太祖討馬超以仁行安西將軍

安南將軍

謝承後漢書曰光武以岑彭為安南將軍

安北將軍

沈約宋書曰劉秀之東莞莒人少孤貧有志操為安北  
將軍雍州刺史上車駕幸新亭視秀之發引

平東將軍

王隱晉書曰武帝伐吳以王濬為平東將軍

平西將軍

蜀志曰馬超聞先主圍劉璋於成都密書請降先主遣人迎超日將兵徑到城下城中震怖璋即稽首以超為平西將軍

沈約宋書曰臨川王義慶為平西將軍

平南將軍

王隱晉書曰武帝伐吳以胡奮為平南將軍

平北將軍

魏志曰太祖征冀州張燕求佐軍拜平北將軍

鎮軍將軍

魏志曰黃初七年魏文帝以陳羣為鎮軍大將軍錄尚書事受顧命

又曰甘露元年以石苞為鎮軍將軍

沈約宋書曰齊王攸為鎮軍將軍

撫軍將軍

魏志曰黃初四年以司馬宣王為撫軍大將軍輔政

又曰齊王嘉平三年以司馬景王為撫軍大將軍輔政  
語林曰簡文為撫軍時坐牀上生塵不聽左右拂去見  
鼠行跡視以為佳有叅軍見鼠以手板格然之撫軍謂  
曰無乃不可

征虜將軍

東觀漢記曰祭遵為征虜將軍廉潔奉公光武歎曰安  
得憂國奉公如祭征虜者乎

魏志曰太祖以臨淄侯植為征虜將軍遣救曹仁呼之有所勅而植醉於是罷之

又曰南陽周太好立功善用兵以為征虜將軍

沈約宋書曰征虜將軍世號金紫將軍

### 冠軍將軍

史記曰楚義帝以宋義為卿子冠軍

漢書曰武帝以霍去病征匈奴功冠三軍封冠軍侯

魏志曰正始中以文欽為冠軍將軍揚州刺史

晉起居注曰武帝泰始七年詔曰議郎胡奮開爽忠亮有文武才幹歷位外內涉練戎事威略之聲著於方外其以奮為冠軍將軍

齊書曰劉悛嘗從駕登蔣山上數歎曰貧賤之交不可忘糟糠之妻不下堂顧謂曰此况卿也世言富貴好改其素情吾雖有四海今日與卿盡布衣之適悛起拜謝遷冠軍將軍

晉書載記曰苻堅寇晉以姚萇為龍驤將軍督益梁州

諸軍事謂萇曰朕本以龍驤建紫龍驤之號未曾假人  
今特以相授山南之事一以委卿堅左將軍竇衡進曰  
王者無戲言此將不祥之徵也惟陛下察之堅默然  
車頻秦書曰苻堅與苻健西入關堅時年十二未有軍  
號健夢有天神遣使者朱衣武冠拜堅為龍驤將軍後  
加此官以應神夢

羊祜別傳曰先時吳童謠云阿童復阿童銜刀浮渡江  
不畏岸上虎但畏水中龍祜聞之曰此必水軍有功即



表王濬為龍驤將軍謀伐吳

輔國將軍

晉書曰王導為輔國將軍導上牋曰昔魏武達政之主也荀文若功臣之最也封不過亭侯倉舒愛子之寵贈不過別部司馬以此格萬物得不跼蹐乎今者臨郡不問賢愚蒙賤皆加重號輒有鼓蓋時有不得者或為恥辱天官混雜朝望頽毀導忝荷重任不能崇浚山海而開創亂源饗竊名位取紊彝典謹送鼓蓋加崇之物請

從導始庶令雅俗區別羣望無惑

王隱晉書曰王濬為輔國將軍

又曰羊琇以輔國將軍開府儀同

領軍將軍

魏志曰文帝即位拜曹休為領軍將軍

晉書曰紀瞻轉領軍將軍當時服其嚴毅雖恒疾病六軍敬憚之瞻以久病請去官不聽復加散騎常侍及王敦之逆帝使謂瞻曰卿雖病但為朕卧護六軍所益多

矣

晉陽秋曰韓康伯年四十九拜領軍疾病占候者云不宜此官固請徙之

何法盛晉中興書曰陶回拜領軍將軍加散騎常侍性方範不畏強禦丹陽尹桓景頗以佞事司徒王導導甚昵之回常慷慨謂景非正人不宜親狎會熒惑守南斗經旬王公語回曰南斗揚州分而熒惑守之吾當遜位以厭此譴回荅曰公以明德作鎮輔弼聖主當親忠貞

遠邪佞與桓景造膝熒惑何由退舍導深愧之

梁書曰明僧祐拜領軍將軍厚自封植以所加鼓吹恒置齋中對之自娛人曰此是羽儀公名望隆重不宜若此荅曰我性愛之恒須見耳或出遊亦以自隨士人笑之

唐書曰貞元十一年以前太子賓客李愿為左領軍大將軍李憑為右威衛大將軍依前兼中丞皆太尉晟之子以免喪故晟諸子同日授官者凡九人

護軍將軍

王隱晉書曰王敦將復作逆明帝問曰何如應詹厲然  
慷慨荅詔曰陛下宜奮赫斯之威臣等當負戈從戎以  
順討逆誠社稷之計也即以詹為護軍將軍同心滅敦

中軍將軍

漢書曰馮奉世字子明元帝以為中軍將軍屯首陽  
魏志曰曹真持節督中外諸軍事中軍將軍受顧命  
王隱晉書曰太始元年以羊祜為中軍將軍總宿衛

游擊將軍

史記曰漢高祖以陳豨為游擊將軍

漢書曰太初元年以蘇建韓說為游擊將軍

袁宏漢記曰建武二年以鄧隆為游擊將軍助朱浮攻

彭寵

魏志曰卞闌少有才學為游擊將軍加散騎常侍

山濤啟事曰游擊將軍諸葛冲精果有文武才擬補充

州詔答曰冲領兵未欲出之

積射將軍

後周書曰于謹除積射將軍又隨廣陽王元深征鮮于修禮停軍中山侍中元晏言於靈太后曰廣陽王以宗室之重受律專征今乃盤桓不進坐圖非望又有于謹者智畧過人為其謀主風塵之隙恐非陛下純臣矣靈太后詔於尚書省門外立榜募能獲謹者許重賞謹聞之乃謂廣陽王曰今女主臨朝取信讒佞脫不明白殿下素心便恐禍至謹請束身詣闕歸罪有司披露心腹

深遂許之謹遂到榜下曰吾知此人衆共詰之謹曰我  
即是也有司以聞靈后初見之大怒謹備述廣陽忠款  
兼陳停軍之狀靈后意解捨之

世語曰積射將軍樊震對武帝稱鄧艾之忠

### 積弩將軍

沈約宋書曰積弩將軍晉官也

齊職儀曰積弩將軍品第四銀章青綬武冠絳朝服佩  
水蒼玉



晉書曰太康十年立積弩積射營各二千五百人並以將軍領之

強弩將軍

漢書曰元狩元年以李沮為強弩將軍伐匈奴

又曰太初二年以路博德為強弩將軍

又曰神雀二年以許延壽為強弩將軍遷大司馬

傅暢晉讚曰晉文王晉臺置強弩將軍掌宿衛

殿中將軍

玄中記曰漢桓帝時出遊河上忽有一青牛從河中出直走盪桓帝邊人皆走太尉何公為殿中將軍有勇力輒走逆之牛見公往乃反走還河未下河公及牛乃以手拔牛左足脫以右手持斧斫牛頭殺之此青牛者是萬年木精也

語林曰庾公欲伐王公先書與郝公曰老賊轉欲轉張殿中將軍舊用才學士以廣視聽而頃悉內面牆人是欲蔽主之明便欲勒數州之衆以除君側之惡今年之

舉茂不濟矣

員外將軍

後魏官氏志曰員外將軍從第八品


直閣將軍

後魏書曰楊曄字延季弘農華陰人也性雅厚頗有文學起家奉朝請稍遷直閣將軍

蕭子顯齊書曰王敬則晉陵南沙人也生而紫脣年長兩腋下生乳各長數寸夢騎五色獅子明帝即位為直

閣將軍

齊書曰劉善明為直閣將軍五年青州沒虜善明母陷北虜移置桑乾善明布衣蔬食哀戚如持喪明帝每見為之歎息時人稱之



太平御覽卷二百三十九